

## نان دَدو دَ زیادتَر از پَنج هزار نفر

حضرت عیسیٰ دوازده جانشین خُو ره دَ پیش خُو طلب کده اونا ره قُدرت دَد تاکه مردُم ره از شرّ جنیّات خلاص کنه و ناجورا ره شفا بدیهه. پس اونا ره ریّی کد تاکه مردُم ره دَ توبه کدو از گناه دعوت کنه و دَ ناجورا شفا بدیهه. و اونا ریّی شُدّه، آغیل دَ آغیل خوش خبری ره اعلان مُوکد و دَ هر جای مردُم ره شفا میدد.

وختیکه جانشینای عیسیٰ پس آمد اونا گذارشِ کارای خُو ره دَ زشی گُفت. و حضرت عیسیٰ اونا ره از دیگرو جدا کده قَد خُو دَ یک شار دَ نامِ 'بیت صیدا' بُرد. ولّ جمعیتِ مردُم که از رفتون شی خبر شُد از پُشت شی ریّی شُد. او خُن ازوا منده نَشی کد و دَ باره پادشاهی خُدا پیغام دده مریضا ره شفا دَد.

نزدیکِ اَفَتو شِشتو دوازده یار شی دَ پیش ازو آمده گُفت:

”مردم ره رخصت کُو تاکه رفته دَ آغیلا و دیارای چاردور  
بخشه خودگونخو نان و جای خاو پیدا کنه، چراکه ای  
منطقه بیابو استه.“

حضرت عیسی دَ جوابِ ازوا گُفت: ”خودن شمو اونا ره نان  
بدید!“

یارای شی دزشی گُفت: ”مو خُو فقط پنج نان و دُو ماهی  
دره. اکو تو میخاهی که بوری و بلدے پکی امزی مردم نان  
بخری؟“ یارا امی گب ره ازی خاطر گُفت که بغیر خاتونو  
و بچکیچا تعدادِ مردا دَ حدودِ پنج هزار نفر بود.

پس حضرت عیسی دَ یارای خُو گُفت: ”اونا ره دَ دل های  
پنجاه نفری بشنید.“ و اونا تمام مردم ره شنید. و  
حضرت عیسی امو پنج نان و دُو ماهی ره گرفته سونِ آسمو  
توخ کده دُعای خیر و برکت کد و بعد ازو نان ره میده  
کده دَ یارای خُو دد تاکه دَ مردم تقسیم کنه. اوخته،

تمامِ مردُم خورد و سیر شد، و از تَی بَخشی ازوا دوازده سَبَد  
پُر شد.